



**2022-imut aningaasanut inatsisissatut siunnersuut.**

(Aningaasaqarnermut Nunamullu Namminermet Naalakkersuisoq)

(Aappassaaneerneqarnera)

2022-imut aningaasanut inatsisissatut siunnersuutip maani inersuarmi siullermeerlugu oqaluuserigatsigu imaqarpallaanngitsutut taavara. Oqarpunga, politikikkut anguniagassanik amigaateqartoq. Aammalu oqarlunga, suliniutissanik nutaanik amigaateqartorujorujussuusoq.

Ajoraluartumillu taamanimiit allanngortoqarpiarsimanngilaq. Allanguutissatut siunnersuutit, uatsinnut saqqummianneqartut teknikkikkut aaqqiinerinnaapput allannguutaanatillu.

Naalakkersuisut suli ICC-imut aningaasaliinissaq salliutippaat aallarnisaasunut aningaasaliinissamiit. ICC aningaasanik amerlanernik pissaq, aallarnisaasut ikinnernik pisut. Isumaqarpunga, tamanna killormoortariaqarualuortoq.

Naalakkersuisut politikkiata kinguneraa, innuttaasut namminneq aningaasatiminnik ikinnernik tigummisalernerannik. Isumaqarpunga, tamanna killormoortariaqarualuortoq, tamannami ilungersorluta anguniaraluarparput, tassa maani nunatsinni najugaqarluni akikinnerulernissaa.

Naalakkersuisut kimigiiserput politikkeqarniarlutik, nunatsinnut isertitanik annikillisaasussamik. Isumaqarpunga, killormoortariaqarualuortoq. Politikkimik ingerlatsisariaqarualuarpugut, aningaasaliisussanut pilerinartumik aammalu inuiaqatigiit aningaasaqarnerannut pitsanngorsaataasumik, taamaasilluta inuiaqatigiittut atugarissaarnerput annertusarlugu tassungalu ilutigalugu qulakkeerlugu, innuttaasut suliffeqarfiillu namminneq aningaasatimik amerlanersaat tigummiinnassagaat.

Nassuerutigisariaqarpara taamaaliornikkut, Naalakkersuisut Demokraatillu imminnut ungasissorujussuit isumaqatigiissusiornissamut, sulili neriuuteqarpugut, isumaqatiginninniarnernullu ullumi aammalu Aningaasaqarnermut nunamullu namminermet Naalakkersuisumut toqqaannartumik isumaqatiginninniarnissatsinnut qilanaarluta.

Taamatut oqareerlunga, nassuerutigisariaqarpara, Aningaasaqarnermut Nunamullu namminermet Naalakkersuisumut maannamut isumaqatiginninniarnernut aallaavianut pakatsigama. Tassani partiitut peqquneqarpugut siunnersuuteqaqqulluta, qanoq ililluta suliniutit soorlu assersuutigalugu Qaqortumi mittarfissaq aningaasalersornissaat kissaatigineripput. Sapinngisarput malillugu tapersiiniarsimavugut, illuatungaaniilli tigusaqarsimanata. Tamanna eqqumiitsorujussuuvoq.



Naalakkersuisunukua aallartitsisussat. Taamaattumillu aamma pissusissamisuusaaq, Naalakkersuisut aningaasaliinissamut periarfissanik assigiinngitsunik qaqitsinissaat partiit isummerfigisassaannik. Tamanna pisimanngilaq, tamannalu oqareernikkut eqqumiillunilu pakatsinarpoq.

Taamaattumik Naalakkersuisut sakkortuumik kajumissaarniarpakka akisussaasuunertik takuteqqullugu, Naalakkersuisutullu pissusilersorlutillu akisussaassusermik takutitseqqullugit. Sakkortusinnaavoq, nuannertuaannaranilu, kisiannili tassa akisussaaffik tigusimasaq taamaattussaavoq. Saperaanii, taava akisussaaffik allanut tunniuttariaqarpoq.

Naggataatigut naatumik Demokraatit aningaasanut inatsimmut isumaqatiginninniarnissamut ersarinnerpaamik kissaataat uteqqissavara;

**Kalaallit Nunaanni najugaqarneq, inuuniarneq suliffeqarfiuteqarnerlu akikinnerusariaqarpoq**

Uani ataatsimiinnermi siunnersuuteqarsimavugut, taakkorpiat qulakkeerniarlugit. Siunnersuutigut ajoraluartumik Naalakkersuisunit teqqeqqumut isimminneqarput, soorluli arsarnermik soqutigisallit tamarmik nalunngikkaat, teqqeqqumiit isimmitsineq aamma isertitsiffiusinnaasarpoq. Neriuppunga uani taamaassasoq, ajornakusoorpasipporli.

Taamatut oqaaseqarluta Demokraatinit allannguutissatut siunnersuutit tamarmik akuerineqarnissaat innersuussutigaarput tamatumalu kingorna Aningaasaqarnermut Inatsisissatut siunnersuut tamarmiusoq Aningaasaqarnermut- aamma Akileraartarnermut ataatsimiititaliami suliareqqitassanngorlugu innersuussutigalugu.